

釋家

壹

釋家  
二  
一

內閣文庫		
三〇函	三二八	漢書
三架	四九	冊號類

釋家  
二  
一

內閣文庫		
番號	漢	3289
冊數	4 ( 1 )	
函號	310	25



觀經玄義分卷第一




淺草文庫

沙門善導集記

先勸大衆發願歸三寶

道俗時衆等各發無上心生死甚難厭佛法復難欣  
共發金剛志橫超斷四流願入彌陀界歸依合掌禮

世尊我一心歸命盡十方法性真如海報化等諸佛  
一一菩薩身眷屬等無量莊嚴及變化十地三賢海  
時劫滿未滿智行圓未圓正使盡未盡習氣亡未亡  
功用無功用證智未證智妙覺及等覺正受金剛心



相應一念後果德涅槃者我守咸歸命三佛菩提尊  
無礙神通力冥加願攝受我等咸歸命三乘等賢聖  
學佛大悲心長時無退者請願遙加備念念見諸佛  
我等愚癡身曠劫來流轉今逢釋迦佛末法之遺跡  
彌陀本誓願極樂之要門定散等迴向速證無生身  
我依菩薩藏頌教一乘海說偈歸三寶與佛心相應  
十方恒沙佛六通照知我今乘二尊教廣開淨土門  
願以此功德平等施一切同發菩提心往生安樂國  
此觀經一部之內先作七門料簡然後依文

釋義第一先標序題第二次釋其名第三依  
文釋義并辯宗旨不同教之大小第四正顯  
說人差別第五料簡定散二善通別有異第  
六和會經論相違廣施問答釋去疑情第七  
料簡章提聞佛正說得益分齊  
第一先標序題者竊以真如廣大五乘不測  
其邊法性深高十聖莫窮其際真如之體量  
量性不出蠢蠢之心法性無邊邊體則元來  
不動無塵法界凡聖齊同兩垢如如則普該

於含識恒沙劫德寂用湛然但以垢障覆深  
淨體無由顯照故使大悲隱於西化驚入火  
宅之門灑甘露潤於群萌輝智炬則朗重昏  
於永夜三檀等備四攝齊收開示長劫之苦  
因悟入永生之樂果不謂群迷性隔樂欲不  
同雖無一實之機等有五乘之用致使布慈  
雲於三界注法雨於大悲莫不等洽塵勞普  
沾未聞之益菩提種子藉此以抽心正覺之  
芽念念因茲增長依心起於勝行門餘八万

四千漸頓則各稱所宜隨緣者則皆蒙解脫  
然衆生障重取悟之者難明雖可教益多門  
凡惑無由遍攬遇因韋提致請我今樂欲往  
生安樂唯願如來教我思惟教我正受然婆  
婆化主曰其請故即廣開淨土之要門安樂  
能人顯彰別意之弘願其要門者即此觀經  
定散二門是也定即息慮以凝心散即廢惡  
以修善迴斯二行求願往生也言弘願者如  
大經說一切善惡凡夫得生者莫不皆乘阿

彌陀佛大願業力為增緣也又佛密意弘  
深教門難曉三賢十聖弗測所關况我信外  
輕毛敢知旨趣仰惟釋迦此方發遣彌陀即  
彼國來迎彼喚此遣豈容不去也唯可勤心  
奉法畢命為期捨此穢身即證彼法性之常  
樂此即畧標序題竟

第二次釋名者經言佛說無量壽觀經一卷  
言佛者乃是西國正音此土名覺自覺覺他  
覺行窮滿名之為佛言自覺者簡異凡夫此

由聲聞狹劣唯能自利闕無利他大悲故言  
覺他者簡異二乘此由菩薩有智故能自利  
有悲故能利他常能悲智雙行不著有無也  
言覺行窮滿者簡異菩薩此由如來智行已  
窮時劫已滿出過三位故名為佛言說者只  
音陳唱故名為說又如來對機說法多種不  
同漸頓隨宜隱彰有異或六根通說相好亦  
然應念隨緣皆蒙證益也言無量壽者乃是  
此地漢音言壽無阿彌陀佛者又是西國正

音又南者是無無者是阿者是無彌者是  
量隨者是壽佛者是覺故言歸命無量壽覺  
此乃梵漢相對其義如此今言無量壽者是  
法覺者是人人法並彰故名阿彌陀佛又言  
人法者是所觀之境即有其二一者依報二  
者正報就依報中即有其三一者地下莊嚴  
即一切寶幢光明互相映發等是二者地上  
莊嚴即一切寶地池林寶樓宮閣等是三者  
虛空莊嚴即一切變化寶宮華網寶雲化鳥

風光動發聲樂等是如前雖有三種差別皆  
是彌陀淨國無漏真實之勝相此即惣結成  
依報莊嚴也又言依報者從日觀下至華座  
觀已來惣明依報就此依報中即有通有別  
言別者華座一觀是其別依唯屬彌陀佛也  
餘上六觀是其通依即屬法界之凡聖但使  
得生者共同受用故言通也又就此六中即  
有真有假言假者即日想水想冰想等是其  
假依由是此六中相似可見境相故言真依

者即從瑠璃山下至寶樓觀已來是其真依  
由是彼國真實無漏可見境相故二就正報  
中亦有其二一者主在嚴即阿彌陀佛是二  
者聖眾在嚴即現在彼眾及十方法界同生  
者是又就此正報中亦有通有別言別者即  
阿彌陀佛是也即此別中亦有真有假言假  
正報者即第八像觀是也觀音勢至等亦如  
是此由眾生障重染惑處深佛恐乍想真容  
無由顯現故使假立真像以注心想同彼佛

以證境故言假正報也言真正報者即第九  
真身觀是也此由前假正漸以息於亂想心  
眼得開粗見彼方清淨二報種種在嚴以除  
昏惑由除障故得見彼真實之境相也言通  
正報者即觀音聖眾等已下是也向來所言  
通別真假者正明依正二報也言觀者照也  
常以淨信心手以持智惠之輝照彼彌陀正  
依等事言經者經也經能持緯得成正丈有  
其文用經能持法理事相應定散隨機義不

零落能令修慧之者必藉教行之緣曰乘願  
 往生證彼無為之法樂既生彼國更無所畏  
 長時起行果極菩提法身常住比若虛空能  
 招此益故曰為經言一卷者此觀經一部雖  
 言兩會正說惣成斯一故名一卷故言佛說  
 無量壽觀經一卷此即釋其名義竟  
 三辯釋宗旨不同教之大小者如維摩經以  
 不議解脫為宗如大品經以空惠為宗此  
 例非一今此觀經即以觀佛三昧為宗亦以

念佛三昧為宗一心迴願往生淨土為體言  
 教之大小者問曰此經二藏之中何藏攝二  
 教之中何教收答曰今此觀經菩薩藏收類  
 教攝  
 四辯說人差別者凡諸經起說不過五種一  
 者佛說二者聖弟子說三者天仙說四者鬼  
 神說五者變化說今此觀經是佛自說問曰  
 佛在何處說為何人說答曰佛在王宮為韋  
 提等說



五料簡定散兩門即有其六一明能請者即  
是韋提二明所請者即是世尊三明能說者  
即是如來四明所說即是定散二善十六觀  
門五明能為即是如來六明所為即韋提等  
是也問曰定散二善因誰致請答曰定善一  
門韋提致請散善一門是佛自說問曰未審  
定散二善出在何文今既教備不虛何機得  
受答曰解有二義一者謗法與無信八難及  
非人此等不受也斯乃朽林頑石不可有生

潤之期此等衆生必無受化之義除斯已外  
一心信樂求願往生上盡一形下收十念乘  
佛願力莫不皆往此即答上何機得受義竟  
二出在何文者即有通有別言通者即有三  
義不同何者一從韋提白佛唯願為我廣說  
無憂惱處者即是韋提標心自為通請所未  
二從唯願佛日教我觀於清淨業處者即是  
韋提自為通請去行三從世尊光臺現國即  
是酬前通請為我廣說之言雖有二義不同

答前通竟言別者則有二義一從韋提白佛  
我今樂生極樂世界彌陀佛所者即是韋提  
自為別選所求二從唯願教我思惟教我正  
受者即是韋提自為請修別行雖有二義不  
同答上別竟從此已下次答定散兩門之義  
問曰云何名定善云何名散善答曰從日觀  
下至十三觀已來名為定善三福九品名為  
散善問曰定善之中有何差別出在何文答  
曰出何文者經言教我思惟教我正受即是

其文言差別者即有二義一謂思惟二謂正  
受言思惟者即是觀前方便思想彼國依正  
二報惣別相也即地觀文中說言如此想者  
名為粗見極樂國土即合上教我思惟一句  
言正受者想心都息緣慮並亡三昧相應名  
為正受即地觀文中說言若得三昧見彼國  
地了了分明即合上教我正受一句定散雖  
有二義不同惣答上問竟又向來解者與諸  
師不同諸師將思惟一句用合三福九品以

為散善正受下句用通合十六觀以為定善  
如斯解者將謂不然何者如華嚴經說思惟  
正受者但是三昧之異名與此地觀文同以  
斯文證豈得通於散善又向來韋提上請但  
言教我觀於清淨業處次下又請言教我思  
惟正受雖有二請唯是定善又散善之文都  
無請處但是佛自開次下散善緣中說云亦  
令未來世一切凡夫已下即是其文  
六和會經論相違廣施問答釋去疑情者就

此門中即有其六一先就諸法師解九品之  
義二即以道理來破之三重舉九品返對破  
之四出此文來證定為凡夫不為聖人五會通  
別時之意六會通二乘種不生之義  
初言諸師解者先舉上輩三人言上上者是  
四地至七地已來菩薩何故得知由到彼即  
得無生忍故上中者是初地至四地已來菩  
薩何故得知由到彼經一小劫得無生忍故  
上下者是種性以上至初地已來菩薩何故

得知由到彼經三小劫始入初地故此三品  
人皆是大乘聖人生位次舉中輩三人者諸  
師云中上是三果人何以得知由到彼即得  
羅漢故中中者是內凡何以得知由到彼得  
須陀洹故中下者是世善凡夫厭苦求生何  
以得知由到彼經一小劫得羅漢果故此之  
三品唯是小乘聖人等也下輩三人者是大  
乘始學凡夫隨過輕重分為三品共同一位  
未願往生者未必然也可知

第二即以道理來破者上言初地至七地已  
來菩薩者如華嚴經說初地已上七地已來  
即是法性生身變易生身斯等曾無分段之  
苦論其功用已經二大阿僧祇劫雙修福智  
人法兩空並是不可思議神通自在轉變無  
方身居報土常聞報佛說法悲化十方須臾  
遍滿更憂何事乃藉韋提為其請佛求生安  
樂國也以斯文證諸師所說豈非錯也答上  
二竟上下者上言從種性至初地已來者未

必然也如經說此等菩薩名為不退身居生死不為生死所染如鵝鴨在水水不能濕如大品經說此位中菩薩由得二種真善知識守護故不退何者一是十方諸佛二是十方諸大菩薩常以三業外加於諸善法無有退失故名不退位也此等菩薩亦能八相成道教化衆生論其功行已經一大阿僧祇劫雙修福智等既有斯勝德更憂何事乃藉韋提請求求生也以斯文證故知諸師所判還成錯

也此責上輩竟次責中輩三人者諸師云中上是三果者然此等之人三塗永絕四趣不生現在雖造罪業必定不招來報如佛說言此四果人與我同坐解脫床既有斯功力更復何憂乃藉韋提請求求生路然諸佛大悲於苦者心偏愍念常沒衆生是以勸歸淨土亦如溺水之人急須偏救岸上之者何用濟為以斯文證故知諸師所判義同前錯也以下可知

第三重舉九品返對破者諸師云上品上生人  
 是四地至七地已來菩薩者何故觀經云  
 三種衆生當得往生何者爲三一者但能持  
 戒修慈二者不能持戒修慈但能讀誦大乘  
 三者不能持戒讀經唯能念佛法僧等此之  
 三人各以已業專精勵意一日一夜乃至七  
 日七夜相續不斷各迴所作之業求願往生  
 命欲終時阿彌陀佛及與化佛菩薩大衆放  
 光授手如彈指頃即生彼國以此文證正是

佛去世後大乘極善上品凡夫日數雖少作  
 業時猛何得判同上聖也然四地七地已來  
 菩薩論其功用不可思議豈藉一日七日之  
 善華臺授手迎接往生也此即返對上上竟  
 次對上中者諸師云是初地四地已來菩薩  
 者何故觀經云不必受持大乘云何名不必  
 或讀不讀故名不必但言善解未論其行又  
 言深信因果不謗大乘以此善根迴願往  
 命欲終時阿彌陀佛及與化佛菩薩大衆一

時授手即生彼國以此文證亦是佛去世後  
 大乘凡夫行業稍弱致使終時迎候有異  
 初地四地已來菩薩論其功用如華嚴經說  
 乃是不可思議豈藉韋提致請方得往生也  
 返對上中竟次對上下者諸師云是種性以  
 上至初地已來菩薩者何故觀經云亦信因  
 果云何亦信或信不信故名為亦又言不謗  
 大乘但發無上道心唯此一句以為正業更  
 無餘善迴斯一行求願往生命欲終時阿彌

隨佛及與化佛菩薩大眾一時授手即得往  
 生以斯文證唯是佛去世後一切發大乘心  
 眾生行業不強致使去時迎候有異若論此  
 位中菩薩力勢十方淨土隨意往生豈藉韋  
 提為其請佛勸生西方極樂國也返對上下  
 竟即此三品去時有異云何異上上去時佛  
 與無數化佛一時授手上中上去時佛與千化  
 佛一時授手上下去時佛與五百化佛一時  
 授手直是業有強弱致使有斯差別耳次對

中輩三人者諸師云中上是小乘三果者何  
故觀經云若有眾生受持五戒八戒修行諸  
戒不造五逆無眾過患命欲終時阿彌陀佛  
與比丘聖眾放光說法來現其前此人見已  
即得往生以此文證亦是佛去世後持小乘  
戒凡夫何小聖也中中者諸師云見道已前  
內凡者何故觀經云受持一日一夜戒迴願  
往生命欲終時見佛即得往生以此文證豈  
得言是內凡人也但是佛去世後無善凡夫

命延日夜逢遇小緣授其小戒迴願往生以  
佛願力即得生也若論小聖去亦無妨但此  
觀經佛為凡說不于聖也中下者諸師云小  
乘內凡已前世俗凡夫唯修世福求出離者  
何故觀經云若有眾生孝養父母行世仁慈  
命欲終時遇善知識為說彼佛國土樂事四  
十八願等此人聞已即生彼國以此文證但  
是不遇佛法之人雖行孝養亦未有心想求  
出離直是臨終遇善勸令往生此人因勸迴



心即得往生又此人在世自然行孝亦不為  
 出離故行孝道也次對下輩三人者諸師云  
 此等之人乃是大乘始學凡夫隨過輕重分  
 為三品未有道位難辨階降者將謂不然何  
 者此三品人無有佛法世俗二種善根唯知  
 作惡何以得知如下上文說但不作五逆謗  
 法自餘諸惡悉皆具造無有慚愧乃至一念  
 命欲終時遇善知識為說大乘教令稱佛一  
 聲尔時阿彌陀佛即遣化佛菩薩來迎此人

即得往生但如此惡人觸目皆是若遇善緣  
 即得往生若不遇善定入三塗未可出也下  
 中者此人先受佛戒受已不持即便毀破又  
 偷常住僧物現前僧物不淨說法乃至無有  
 一念慚愧之心命欲終時地獄猛火下時俱  
 至現在其前當見火時即遇善知識為說彼  
 佛國土功德勸令往生此人聞已即便見佛  
 隨化往生初不遇善獄火來迎後逢善故化  
 佛來迎斯乃皆是彌陀願力故也下下者此

等衆生作不善業五逆十惡具諸不善此人  
 以惡業故定墮地獄多劫無窮命欲終時遇  
 善知識教稱阿彌陀佛勸令往生此人依教  
 稱佛乘念即生此人若不遇善必定下沉由  
 終遇善七寶來迎又看此觀經定善及三輩  
 上下文意想是佛去世後五濁凡夫但以遇  
 緣有異致令九品差別何者上品三人是遇  
 大凡夫中品三人是遇小凡夫下品三人是  
 遇惡凡夫以惡業故臨終藉善乘佛願力乃

得往生到彼華開方始發心何得言是始學  
 大乘人也若作此見自失悞他為害茲甚今  
 以一一出文顯證欲使今時善惡凡夫同沾  
 九品生信無疑乘佛願力悉得生也  
 第四出文顯證者問曰上來返對之義云何  
 得知世尊定為凡夫不為聖人者未審直以  
 人情準義為當亦有聖教來證答曰衆生垢  
 重智惠淺近聖意弘深豈寧自輒今者一一  
 悉取佛說以為明證就此證中即有其十句

何者第一如觀經云佛告韋提我今為汝廣  
說眾譬亦令未來世一切凡夫欲修淨業者  
得生西方極樂國土者是其一證也二言如  
來今者為未來世一切眾生為煩惱賊之所  
害者說清淨業者是其二證也三言如來今  
者教韋提希及未來世一切眾生觀於西方  
極樂世界者是其三證也四言韋提白佛我  
今因佛力故見彼國土若佛滅後諸眾生等  
濁惡不善五苦所逼云何當見彼佛國土者

是其四證也五如日觀初云佛告韋提汝及  
眾生專念已下乃至一切眾生自非生盲有  
目之徒見日已來者是其五證也六如地觀  
中說言佛告阿難汝持佛語為未來世一切  
眾生欲脫苦者說是觀地法者是其六證也  
七如華座觀中說言韋提白佛我因佛力得  
見阿彌陀佛及二菩薩未來眾生云何得見  
者是其七證也八次下答請中說言佛告韋  
提汝及眾生欲觀彼佛者當起想念者是其

八證也九如像觀中說言佛告韋提諸佛如  
來入一切衆生心想中是故汝等心想佛時  
者是其九證也十如九品之中一一說言爲  
諸衆生者是其十證也上來雖有十句不同  
證明如來說此十六觀法但爲常沒衆生不  
干大小聖也以斯文證豈是謬哉

第五會通別時意者即有其二一論云如人  
念多寶佛即於無上菩提得不退墮者凡言  
菩提乃是佛果之名亦是正報道理成佛之

法要須万行圓備方乃剋成豈將念佛一  
即望成者無有是處雖言未證万行之中是  
其一行何以得知如華嚴經說功德雲比丘  
語善財言我於佛法三昧海中唯知一行所  
謂念佛三昧以此文證豈非一行也雖是一  
行於生死中乃至成佛永不退沒故名不墮  
問曰若尔者法華經云一稱南無佛皆已成  
佛道亦應成佛竟也此之二文有何差別答  
曰論中稱佛唯欲自成佛果經中稱佛爲簡

異九十五種外道然外道之中都無稱佛之人但使稱佛一口即在佛道中攝故言已竟二論中說云如人唯由發願生安樂土者久來通論之家不啻論意錯引下品下生十聲稱佛與此相似未即得生如一金錢得成十者多日乃得非一日即得成十十聲稱佛亦復如是但與遠生作因是故未即得生道佛直為當來凡夫欲令捨惡稱佛誑言道是實未得生名作別時意者何故阿彌陀經云佛

告舍利弗若有善男子善女人聞說阿彌陀佛即應執持名号一日乃至七日一心願生命欲終時阿彌陀佛與諸聖眾迎接往生次下十方各如恒河沙等諸佛各出廣長舌相遍覆三千大千世界說誠實言汝等眾生皆應信是一切諸佛所護念經言護念者即是上文一日乃至七日稱佛之名也今既有斯聖教以為明證未審今時一切行者不知何意凡小之論乃加信受諸佛誠言返將妄語

苦哉奈劇能出如此不忍之言雖然仰願一切欲往生知識等善自思量寧傷今世錯信佛語不可執菩薩論以為指南若依此執者即是自失悞他也問曰云何起行而言不得往生答曰若欲往生者要須行願具足方可得生今此論中但言發願不論有行問曰何故不論答曰乃至一念曾未措心是故不論問曰願行之義有何差別答曰如經中說但有其行行即孤亦無所至但有其願願即塵

亦無所至要須願行相扶所為皆竟是故此論中直言發願不論有行是故未即得生與遠生作因者其義實也問曰願意云何乃言不生答曰聞他說言西方快樂不可思議即作願言我亦願生道此語已更不相續故名願也今此觀經中十聲稱佛即有十願十行具足云何具足言南無者即是歸命亦是發願迴向之義言阿彌陀佛者即是其行以斯義故必得往生又來論中稱多寶佛為求

佛果即是正報下唯發願求生淨土即是依  
報一正一依豈得相似然正報難期一行雖  
精未剋依報易求所以一願之心未入雖然  
譬如邊方投化即易為至即難今時願往生  
者並是一切投化衆生豈非易也但能上盡  
一形下至十念以佛願力莫不皆往故名易  
也斯乃不可以言定義取信之者懷疑要引  
聖教來明欲使聞之者方能遣惑  
第六會通二乘種不生義者問曰彌陀淨土

為當是報是化也答曰是報非化何得如  
如大乘同性經說西方安樂阿彌陀佛是報  
佛報土又無量壽經云法藏比丘在世饒王  
佛所行菩薩道時發四十八願一一願言若  
我得佛十方衆生稱我名号願生我國下至  
十念若不生者不取正覺今既成佛即是酬  
因之身也又觀經中上輩三人臨命終時  
言阿彌陀佛及與化佛來迎此人然報身兼  
化共來授手故名為與以此文證故知是報

然報應二身者眼目之異名前翻報作應後  
 翻應作報凡言報者因行不虛定招來果以  
 果應因故名為報又三大僧祇所修万行必  
 定應得菩提今既道成即是應身斯乃過現  
 諸佛辯立三身除斯已外更無別體縱使無  
 窮八相名号塵沙剎體而論衆歸化攝今彼  
 彌陀現是報也問曰既言報者報身常住永  
 無生滅何故觀音授記經說阿彌陀佛亦有  
 入涅槃時此之一義若為通釋答曰不入

義者唯是諸佛境界尚非三乘淺境豈  
 况小凡輒能知也雖然必欲知者敢引佛經  
 以為明證何者如大品經涅槃非化品中說  
 云佛告須菩提於汝意云何若有化人作化  
 人是化頗有實事不空者不須菩提言不也  
 世尊佛告須菩提色即是化受想行識即是  
 化乃至一切種智即是化須菩提白佛言世  
 尊若世間法是化出世間法亦是化所謂四  
 念處四正勤四如意足五根五力七覺分八



聖道分三解脫門佛十力四無所畏四無礙  
智十八不共法并諸法果及賢聖人所謂須  
隨洎斯隨舍阿那含阿羅漢辟支佛菩薩摩  
訶薩諸佛世尊是法亦是化不佛告須菩提  
一切法皆是化於是法中有聲聞法變化有  
辟支佛法變化有菩薩法變化有諸佛法變  
化有煩惱法變化有業因緣法變化以是因  
緣故須菩提一切法皆是化須菩提白佛言  
世尊是諸煩惱斷所謂須隨洎果其隨舍果

阿那含果阿羅漢果辟支佛道斷諸煩惱習  
皆是變化不佛告須菩提若有法生滅相者  
皆是變化須菩提言世尊何等法非變化佛  
言若法無生無滅是非變化須菩提言何等  
是不生不滅非變化佛言無誑相涅槃是法  
非變化世尊如佛自說諸法平等非聲聞作  
非辟支佛作非諸菩薩摩訶薩作非諸佛作  
有佛無佛諸法性常空性空即是涅槃云何  
涅槃一法非如化佛告須菩提如是如是諸

法平等非聲聞所作乃至性空即是涅槃若  
 新發意菩薩聞是一切法皆畢竟性空乃至  
 涅槃亦皆如化者心則驚怖為是新發意菩  
 薩故分別生滅者如化不生不滅者不如化  
 耶今既以斯聖教驗知彌陀定是報也縱使  
 後入涅槃其義無妨諸有智者應知問曰彼  
 佛及土既言報者報法高妙小聖難階垢障  
 凡夫云何得入答曰若論眾生垢障實難欣  
 趣正由託佛願以作強緣致使五乘齊入問

曰若言凡夫小聖得生者何故天親淨土論  
 云女人及根缺二乘種不生今彼國中現有  
 二乘如斯論教若為消釋答曰子但誦其文  
 不闕理况加以封拙懷迷無由啓悟今引佛  
 教以為明證却汝疑情何者即觀經下輩三  
 人是也何以得知如下品上生云或有眾生  
 多造惡法無有慚愧如此愚人命欲終時遇  
 善知識為說大乘教令稱阿彌陀佛當稱佛  
 時化佛菩薩現在其前金光華蓋迎還彼土

華開已後觀音為說大乘此人聞已即發無  
上道心問曰種之與心有何差別答曰但以  
取便而言義無差別當華開之時此人身器  
清淨正堪聞法亦不簡大小但使得聞即便  
生信是以觀音不為說小先為說大聞大歡  
喜即發無上道心即名大乘種生亦名大乘  
心生又當華開時觀音先為說小乘者聞小  
生信即名二乘種生亦名二乘心生此品既  
分下二亦然此三品人俱在彼發心正由聞

大即大乘種生由不聞小故所以二乘種不  
生凡言種者即是其心也上來解二乘種不  
生義竟女人及根缺義者彼無故可知又十  
方眾生修小乘戒行願往生者一無妨礙悉  
得往生但到彼先證小果證已即轉向大  
轉向大以去更不退生二乘之心故名二乘  
種不生前解就不定之始後解就小果之終  
也應知

第七料簡章提聞佛正說得益分齊者問曰

韋提既言得忍未審何時得忍出在何文答  
曰韋提得忍出在第七觀初經云佛告韋提  
佛當為汝分別解說除苦惱法說是語時無  
量壽佛住立空中觀音勢至侍立左右時韋  
提應時得見接足作禮觀喜讚歎即得無生  
法忍何以得知如下利益分中說言得見佛  
身及二菩薩心生歡喜歎未曾有廓然大悟  
得無生忍非是光臺中見國時得也問曰上  
文中說言見彼國土極妙樂事心歡喜故應

時即得無生法忍此之一義云何通釋答曰  
如此義者但是世尊酬前別請舉勸利益方  
便之由序何以得知次下文說言諸佛如  
來有異方便令汝得見次下日想水想冰想  
乃至十三觀已來盡名異方便也欲使眾生  
於此觀門一一得成見彼妙事心歡喜故即  
得無生斯乃直是如來慈哀未代舉勸勵修  
欲令積學之者無遺聖力冥加現益故也  
證曰掌握機系十有三結條條順理以應玄

門訖此義周三呈前證者矣上來雖有七段  
 不同惣是文前玄義料簡經論相違妨難  
 一引教證明欲使信者無疑求者無滯應知

觀經玄義分卷第一

